

## Kei Whea Te Aute

Kei Whea te raa (Kaea)  
Kei whea te Aute  
I whakatookia e Pokere  
Ki te taha whare  
Tee titiro naa te kohukohu nui,  
Ko te rangirua o Te Mateawa  
Ko koe ra Puku  
Ko koe Rangiaohia  
Koorua Whanaunga, Kotingaa e  
I puuwenuatia teenei noho e  
I puuwenuatia teenei noho e

Piki ake ra (Kaea)  
Piki ake kake Rataroa  
Tirotiro kau iho ana aku rahi  
hei piinaki, te maara a Raamuri, Ngaropapa  
Teena pēpehatia ai  
Wahine takitaki i te mate  
Wahine hohou i te rongo  
Te wharau o te tini e  
Te wharau o te mano e

Whakawhiti au (Kaea)  
Whakawhiti atu au  
Tuu ana ngarungaru  
Te papatotara Rangipari  
Ko te urupounamu e  
Me aha koe Hauraki  
Ara Tuutonu, Matau  
Ki te rau o te patu  
Ki te Toki o Paihau  
He taonga tuupato  
He hau kai taonga e

Ka maanu au (Kaea)  
 Ka maanu teretere  
 Ki te rua manu titii  
 Whaatoro atu ra  
 Tiikina rawatia  
 Hei kai maau  
 He manawa titii  
 Haere tika taku haere  
 Ki te taapapa kuumara  
 Noo namata e  
 Ko tuu Ahuahu teenaa  
 Te Maru o te Iwi e

Arumia e (Kaea)  
 Aruaru te rarawa ki Arikitaahi  
 Ki Moehau, ki Raukawa  
 Hei ngaki maa Paretipa e  
 Ka huri taku mata  
 Ki te tihi o Motutere  
 Ngotengote te uukaipoo  
 Te Wai-a-u o taku tupuna e

Kua tae au (Kaea)  
 Kua tae au ki te pohu o Kiitahi  
 Te tohu taa moko o Te Taniwha  
 Naa Patapata te kii  
 Rite ki te Toroa  
 Rapu kai noa iho  
 Whanaunga Kiitahi  
 Kohikohi e

Teenaa peepohatua  
 E mihi ana ki te whenua  
 E tangi ana ki te tangata  
 Ko Moehau kei waho  
 Ko Te Aroha kei roto  
 Ko Hauraki Te Whenua  
 Ko Tiikapa te Moana  
 Ko Marutuuahu te tangata  
 E ko ko ia  
 Te tangata e

